

A instala directiva nobo di Scouting Aruba

John Hessen ta na cabes di e movimiento scout na Aruba



ORANJESTAD – Cada tres aña Scouting Aruba, cu tin como tarea pa dirigi e organisacion completo. Diasabra atardi a tuma luga un ceremonia riba Linear Park, unda a instala e directiva nobo, hunto cu dos miembro ordinario cu lo sostiene e trabounan den e directiva. Esaki a sosode dilanti Minister di Husticia y Enseñansa, mr. Drs. Arthur

Dowers y tambe demas invitadonan.

E directiva nobo di Scouting Aruba ta consisti di John Hessen como Hoofd Commissaris, Thomas (Tommy) Eramus como Hoofdkwartierscommissaris "Operations", Luigi Heredia como Hoofdkwartierscommissaris "Finansa", Lizmarie Flanegin como

Hoofdkwartierscommissaris "Training & Vorming", Sharline Geerman-Rodriguez, Pader Jairo Maduro como "Chaplain" y Patrick Paskel como Relacionista Publico.

Heinrich Johannes Hessen, miho conoci como John Hessen, a drenta scouting na aña 1971, como Welp, den grupo Santanero di Dakota. Cu 12 aña di edad el a bira Verkenner y ora e tabatin 18 aña, el a bira Voortrekker y tambe e la fungi como Vaandrig den Troep di Santanero Groep. Na edad di 21 aña el a bira Hopman y na edad di 25 aña el a wordo instala como Groepsleider di Santanero Groep.

Despues cu John Hessen a fungi 5 aña como Groepsleider, a nombr'e como Hoofdkwartierscommissaris Algemene Dienst di Vereniging de Arubaanse Padvinders. Despues cu a funda Scouting Aruba, John Hessen a ser nombra como Hoofdkwartierscommissaris Training & Vorming, cual funcion el a ocupa te diasabra.

Durante su carera den scouting, John Hessen a funda



varios grupo, manera Grupo Kimball O'Hara, e ta co fundado di Grupo Scout Sonrisa, el a funda Grupo Abel Tasman di Zeeverkenners, cu algun aña pasa tabata reuni den Marinierskazerne na Savaneta y recientemente John Hessen a funda Grupo Monseigneur Oscar Romero, hunto cu Pastor Jairo. Esaki ta e grupo nobo di Scouting Aruba cu ta bao guia di Axcel Figaroa.

Na aña 1999 John Hessen a ricibi e Koninklijke Onderscheiding, como Lid in de Orde van Oranje Nassau, como reconocimiento pa su trabounan boluntario na co-

munidad di Aruba. John Hessen a studia pa maestro di scol y actualmente e ta Inspecteur-Generaal van het Onderwijs.

E movcion scout ta existi desde aña 1907 ora cu Lord Baden Powell a cuminsa cun'e 106 aña pasa y cu lo keda existi pa semper pasobra Once a Scout, Always a Scout. A funda Scouting Aruba dia 23 di April 2000 despues cu 4 organisacion scout a uni y forma un solo organisacion. Scouting Aruba a logra afilia na Interamerican Scout Organization (ISO) cu ta miembro tambe di World Scout Organization esta WOSM. □